



Pou Piblikasyon Imedya: 15/12/2022

GOUVÈNÈ KATHY HOCHUL

**GOUVÈNÈ HOCHUL ANKOURAJE MOUN YO PRAN PREKOSYON ANVAN  
TANPÈT IVÈNAL LA KI TA DWE AFEKTE PIFÒ ETA NEW YORK JEDI JISKA  
SAMDI**

*Yo prevwa 12 a 18 pous nèj nan kèk pati nan North Country, avèk kèk pati nan Mohawk Valley, New York Santral, Southern Tier ak Rejyon Kapital la yo ki ta dwe resevwa 8 a 12 pous nèj jiska samdi*

*Yo prevwa melanj ivènal nèj ak lapli nan Lwès New York, Finger Lakes, Southern Tier ak New York Santral*

*Meteyo ivènal la pral lakòz kondisyon vwayaj danjere nan plizyè rejyon, kote ka gen blakawout nan zòn ki gen chit nèj yo*

*Gouvènè Hochul mande pou moun yo pa fè vwayaj ki pa nesesè jedi apremidi jiska vandredi nan rejyon ki afekte yo*

Gouvènè Kathy Hochul jodi a te ankouraje moun yo pran prekosyon anvan yon tanpèt ivènal ki ta dwe afekte pifò eta a, patikilyèman North Country, Mohawk Valley, Rejyon Kapital, rejyon Mid-Hudson ak New York Santral, avèk yon melanj nèj ak lapli k ap kòmanse jedi ak kontinye jiska vandredi. Apati jedi, plizyè pati nan North Country te kapab resevwa 12 a 18 pous oswa plis nèj, epi plizyè pati nan Mohawk Valley, New York Santral, Southern Tier ak Rejyon Kapital yo ta dwe resevwa jiska yon pye nèj nan samdi, avèk pik to chit nèj jiska de pous pa èdtan posib jedi swa ak vandredi. Yo pa prevwa lapli glase oswa lagrèl pral pwodwi gwo akimilasyon glas pandan evènman an. Sepandan, kondisyon vwayaj yo pral danjere apati jedi swa epi nèj ka mouye ak ase lou pou lakòz blakawout lokalize. Gouvènè Hochul te ankouraje Nouyòkè yo pou yo siveye previzyon lokal yo, pou yo prepare pou kondisyon meteyo k ap chanje jedi swa jiska vandredi, epi pou yo pa fè vwayaj ki pa nesesè nan rejyon ki afekte yo.

"Mwen ankouraje tout Nouyòkè yo pou yo pran prekosyon epi pou yo pare pou posib blakawout ak vwayaj difisil nan jedi ak vandredi pandan nèj ak glas ap akimile nan pati lès nò eta a", **Gouvènè Hochul te deklare.** "Ajans repons pou ijans nou yo byen prepare pou tanpèt sa a epi yo pral travay 24 sou 24 jou k ap vini yo pou kenbe Nouyòkè yo an sekirite".

Anplis nèj ki tonbe nan previzyon an, yo prevwa rejyon Vil New York ak Long Island pral resevwa jiska de pous lapli apati jedi apremidi pou rive samdi maten. Presipitasyon sa a ka kòmanse kòm yon melanj ivènal nan jedi apremidi ki ta ka afekte vwayaj nan aswè.

Gen plizyè avètisman ak alèt ki te pibliye pou plizyè pati nan eta a jiska samdi. Pou ou kapab jwenn yon lis konplè sou avètisman meteyowolojik yo nan zòn ou an, vizite [sit entènèt](#) Sèvis Meteyowolojik Nasyonal zòn ou an.

**Komisè Divizyon Sekirite Teritwa ak Sèvis pou Ijans Eta New York la, Jackie Bray, te deklare,** "Pote bon atansyon ak previzyon lokal ou jodi a ak demen. Pifò nan eta a pral resevwa plizyè pous nèj epi gen kèk rejyon ki pral resevwa plis pase yon pye. Li ka danjere pou vwayaje vandredi nan sèten rejyon, kidonk, si ou oblije vwayaje, asire w ke ou gen plis tan nan vwayaj ou epi pran tout prekosyon ki nesèsè".

### **Konsèy sekirite**

#### **Vwayaj**

Men kèk nan konsèy ki pi enpòtan pou woule ansekirite:

- Pa kondui, sof si sa nesèsè.
- Pran prekosyon sou pon yo paske li ka fè glas la pi vit pase sou wout yo.
- Si ou dwe vwayaje, asire ou ke otomobil ou gen materyèl pou siviv tankou lenn, yon pèl, flash ak pil anplis, rad cho anplis, yon pè chèn pou kawotchou, kab boustè pou batri, manje ki bay enèji rapid ak rad ki gen koulè klere pou sèvi kòm drapo detrès.
- Si ou gen telefòn selilè oswa lòt aparèy kominikasyon tankou yon wòki tòki disponib pou ou sèvi, kenbe batri a chaje epi kenbe l avè ou tout lè ou ap vwayaje. Si ou ta vin bloke, ou ap kapab rele pou mande èd, enfòmè sekouris yo sou kote ou ye.
- Prensipal kòz lanmò ak blesi pandan tanpèt ivè se aksidan transpò. Anvan ou chita dèyè volan, pa bliye retire glas ak nèj ki sou machin ou an; bon vizyon se sekre kondui byen. Planifye arè ou yo epi kite plis distans ant machin yo. Pote plis atansyon epi sonje pil nèj yo ka maske timoun ki pi piti yo. Toujou koresponn vitès ou selon kondisyon wout la epi selon meteyowolojik.
- Li enpòtan pou chofè ki sou tout wout yo konnen vitès chasnèj yo se 56 kilomèt alè, sa ki nan anpil ka pi ba pase limit vitès ki make a, pou yo ka garanti sèl yo simen an rete nan vwa sikilasyon yo epi pa dispèse andeyò wout yo. Anpil fwa sou otowout ant eta yo, chasnèj yo opere kòtakòt, kòm se fason ki pi efikas epi ki ofri plis garanti pou netwaye plizyè vwa yon sèl kou.
- Chofè machin ak pyeton dwe sonje chofè chasnèj yo ka wè devan yo sou yon distans limite, epi gwosè ak pwa chasnèj yo ka fè l difisil pou manevre epi frennen touswit. Nèj chasnèj la ap soufle dèyè li ka diminye vizibilite anpil oubyen kreye yon vwal blan. Chofè machin yo pa ta dwe eseye double chasnèj yo, ni swiv yo twò pre. Kote ki gen plis sekirite pou chofè

machin yo woule se lwen dèyè chasnèj yo, kote wout la klè epi gen sèl sou li. Pa janm eseye pase sou yon chasnèj pandan l ap fonksyone.

### **Jefò Fizik**

Gwo jefò fizik yo, tankou pèlte nèj, netwayaj debri oswa pouse yon machin, sa kapab ogmante risk pou yon atak kadyak. Pou evite pwoblèm:

- Rete nan chalè, abiye avèk rad ki cho epi ralanti lè w ap travay deyò.
- Repoze souvan pou evite twòp efò fizik.
- Si w santi doulè nan pwatrin, souf kout, oswa doulè nan machwè w k ap gaye nan bra w, sispann sa w ap fè a epi chèche èd imedyatman.

### **Blakawout yo**

- Rele konpayi sèvis piblik ou a pou ou ka konnen orè reparasyon nan zòn nan.
- Etenn oswa deploge limyè ak aparèy menaje pou ou ka evite yon sichaj kouran lè yo repara sèvis la: kite yon limyè limen pou endike lè yo te retabli kouran.
- Si chalè a ale pandan yon tanpèt ivènal, kenbe kay la cho lè w fèmen chanm ou pa bezwen yo.

### **Sekirite pou Chofaj**

- Sèvi ak sous chalè altènatif ki an sekirite sèlman tankou yon chemine, ti recho a bwa oswa a chabon ki byen ayere oswa aparèy chofaj pòtab.
- Toujou Swiv enstwiksyon fabrikan yo.
- Lè w ap itilize sous chalè altènatif tankou yon chemine, recho a bwa, elatriye, toujou asire w ke ou gen bon vantilasyon.
- Kenbe rido, sèvyèt ak manchon pwoteksyon yo lwen sifas cho.
- Gen yon ekstenktè ak detektè lafimen epi asire w yo fonksyone.
- Si w itilize aparèy chofaj ki mache ak kewozèn pou konplete gaz chofaj regilye w la, oswa kòm yon sous chalè ijans, swiv konsèy sekirite sa yo:
  - Swiv enstwiksyon fabrikan yo.
  - Sèvi ak gaz ki kòrèk la sèlman pou inite w la.
  - Remete konbistib deyò sèlman epi lè inite a frèt sèlman.
  - Kenbe aparèy chofaj nan yon distans omwen twa pye ak mèb yo lòt eleman konbistib yo.
  - Lè w ap itilize aparèy chofaj la, sèvi ak pwoteksyon kont dife epi vantele byen.

Pou plis konsèy sekirite, vizite <https://dhses.ny.gov/safety>.

###